

1332 Januar 21.

Graf Reinald (II.) von Gelbern und Zütphen verkauft Wilhelm von Zijendoorn und den im Werth von Zijendoorn und Ochten Geerben das Recht, einen Wasser- gang anzulegen.

Wy Reynoud greve van Ghelren ende van Zutphen doen cond allen luden, dat wy vercoft hebben Willem van Ysenderen ende alle den ghenen, die gheerft zyn in den weert van Ysenderen ende van Ochten, enen waterghanc te leyden ende te maken uyt dien werde doer den bandyc; also dat si een sluse in dien bandyc legghen moghen, twe voet wyt ende twe voet hoech, also hem beste oerbaer dunct, ende van dien dyc ende van dier sluse voert te leyden in die grote landeweteringhe, tot horen meesten oerbaer ende ten minsten scaden, also die hemeraet, die wy daerop zoelen doen riden, wisen sal; doer welken waterghanc si leyden moghen uyt den selven weert alle quelwater ende reghenwater, dat daerin comen sal. Maer ghevielt, dat die uterdyc van den werde inghinghe in eyngher tyt ende die dyc kortelyc beslaghen worde, soe moghen si doer dien selven waterghanc ende doer die sluse dat water leiden also langhe, also sie hoer walle ende hoer wanghen van den waterghanc behauden, dat die niet over en ghaen. Maer ghevielt, dat die wanghen inghinghen ende dat si die niet ghehauden en conden, soe sal onse amptman daerop riden ende die sluse thoeslaen ende stoppen op Willems coste ende der gheerfden voerscreven, ist dat syt selve niet en doen. Maer wanneer dat water ghevallen is, also dat die wanghen boven zyn, soe mach Willem ende die gheerfden voerghenoempt die sluse untstoppen ende opdoen op horen cost ende hoer water daerdoer leiden, also sie tevoren deden, in allen maniren, also voerscreven is. Ende desen selven waterghanc ghelove wy Willem van Ysenderen ende allen den gheerfden in den weert voerscreven ende horen nacomelinghen te waren ende daerin te hauden eerflic met ghoeden trouwen sonder arghelist. In orconde des heb wy onsen seghel aen desen brief doen hanghen. Ghegheven int jaer ons heren dusent driehondert twe ende dertich, op sente Agnyten dach.

Orig. Nr. 7. Siegel ab.

Kreis
Warendorf
S. 208

[5
208